



Broj: 02/1-13-23-3337/2025
Breza, 30.10.2025. godine

NACRT

Na osnovu člana 20. Statuta Općine Breza („Službeni glasnik Općine Breza“, broj: 7/21), člana 2. stav 1. Zakon o osnovima bezbjednosti saobraćaja na putevima u BiH („Službeni glasnik BiH“, br. 6/06, 75/06, 44/07, 84/09, 48/10, 48/10, 18/13, 8/17, 89/17, 9/18, 46/23 i 88/23), člana 8. i 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, br. 49/06 i 51/09), Općinsko vijeće Breza na sjednici održanoj dana ____2025. godine, donosi

O D L U K U

o bezbjednosti i organizaciji saobraćaja na putevima općine Breza

I – OSNOVNE ODREDBE

Član 1. **(Predmet Odluke)**

Ovom Odlukom uređuju se bezbjednost i organizacija saobraćaja, određuju saobraćajnice sa pravom prvenstva prolaza, ograničenja režima saobraćaja i zabrane na cestama i raskrsnicama, zaustavljanje i parkiranje vozila, lokacije za početnu obuku kandidata za vozače i uslovi za organizovanje priredbi i drugih aktivnosti na cestama, propisuju posebne mjere bezbjednosti saobraćaja na cestama koje su jedinstvene na cijelom području općine Breza.

Član 2. **(Javna saobraćajna površina)**

Javnim saobraćajnim površinama u smislu ove Odluke smatraju se lokalne i nekategorisane ceste, ulice, trгови, trotoari, parkirališta, stajališta javnog gradskog saobraćaja, mostovi, podvožnjaci, nadvožnjaci i slične površine.

Član 3 **(Saobraćaj na cestama)**

Saobraćaj na cestama namijenjenim za saobraćaj vozila i pješaka dozvoljen je svakom pod jednakim uvjetima u granicama propisanim Zakonom o osnovama bezbjednosti saobraćaja na putevima u BiH i ovom Odlukom.

Na javnim saobraćajnim površinama ne smiju se poduzimati radnje ili djelatnosti koje bi mogle oštetiti javnu saobraćajnu površinu ili ugroziti bezbjednost i protočnost motornog, pješačkog ili biciklističkog saobraćaja.

II – ORGANIZACIJA I REGULACIJA SAOBRAĆAJA

Član 4. (Nadležnosti)

Služba za privredu (u daljem tekstu: nadležna služba) u skladu sa prostorno - planskom dokumentacijom vrši poslove praćenja organizacije i regulacije saobraćaja, odobrava, predlaže i provodi mjere za unapređenje saobraćajnog sistema.

Član 5. (Tehnička regulacija saobraćaja)

Tehničku regulaciju saobraćaja na javnim površinama vrše pravna i fizička lica koja su registrovani za obavljanje tih poslova, kojima se povjeravaju poslovi regulacije putem ugovora.

Tehničkom regulacijom saobraćaja u smislu ove Odluke smatra se postavljanje, uklanjanje, zamjena i održavanje saobraćajne signalizacije (horizontalne, vertikalne i svjetlosne) i opreme na javnoj cesti ili ulici.

Tehnička regulacija horizontalne, vertikalne i saobraćajne signalizacije obavlja se na osnovu Projekata saobraćajne signalizacije.

Član 6. (Izmjena režima saobraćaja)

Privremene izmjene režima saobraćaja ili privremeno ograničenje saobraćaja odobrava nadležna služba posebnim odobrenjem i dužna je obavijestiti Policijsku stanicu Breza i javnost o određenim izmjenama režima saobraćaja i drugim aktivnostima na saobraćajnicama putem sredstva informisanja i drugim aktima.

U hitnim slučajevima koji ne trpe odlaganje, kao što su saobraćajne nezgode, protesti, dolasci delegacija i zbog održavanja javnog reda i mira, izmjenu režima saobraćaja može izvršiti i Policijska stanica Breza.

Član 7. (Postavljanje znakova, informacija, reklamnih panoa i natpisa)

Osim propisanih saobraćajnih znakova na cestama namijenjenim za saobraćaj u nadležnosti Općine Breza i Kantonalne direkcije za ceste Zeničko-dobojskog kantona, dozvoljeno je postavljanje znakova i informacija, reklamnih panoa i natpisa koji su u skladu sa Zakonom o osnovama bezbjednosti saobraćaja na putevima u BiH, Zakonom o cestama FBiH i Pravilnikom o postavljanju reklamnih znakova na cestama.

Postavljanje znakova informacija, reklamnih panoa i natpisa odobravaju nadležne općinske službe.

Član 8. (Vođenje evidencije o saobraćajnoj signalizaciji)

Nadležna služba je dužna voditi i čuvati evidenciju o svojoj saobraćajnoj signalizaciji, na saobraćajnicama u nadležnosti općine Breza.

Obaveze iz prethodnog stava mogu se povjeriti i ugovorom pravnom licu koje ugrađuje i održava saobraćajnu signalizaciju.

Član 9.
(Praćenje stanja bezbjednosti u saobraćaju)

Policijska stanica Breza prati stanje bezbjednosti u saobraćaju na području općine Breza, poduzima mjere sigurnog odvijanja saobraćaja, sigurnosti regulacije saobraćaja i druge mjere iz njene nadležnosti u cilju osiguravanja normalnog odvijanja saobraćaja, te najmanje jedan puta godišnje dostavlja podatke nadležnom organu koji upravlja cestama na području općine Breza o vrstama, mjestima i vremenu događaja saobraćajnih nezgoda.

III – PRVENSTVO PROLAZA

Član 10.
(Saobraćajnice sa prvenstvom prolaza)

Prvenstvo prolaza vozila određuje se prema kategoriji saobraćajnica kako slijedi:

- (1) Na regionalnij cesti R-444 Podlugovi – Breza – Vareš, ulicama:
 - Rudarska,
 - Branilaca grada,
 - Alije Uzetbegovića, i
 - Šehidska.
- (2) Na lokalnim cestama:
 - R444-Vrbovik (Od spoja RC R-444 u Vrboviku, kroz naselje Vrbovik do Džamije)
 - Podžupča –Podgora (Od spoja RC R-444 u Podžupči, kroz naselje Župča do naselja Podgora - prva raskrsnica)
 - Župča – Izbod („Sarajevski put“ od spoja sa LC Podžupča - Podgora do izlaza na LC u Izbodu)
 - Kahve – Izbod (Od spoja RC R - 444 na Kahvama, kroz naselje Kahve i raskrsnicu ispred okna „Kamenice“ i dalje ide kroz naselje Izbod do raskrsnice za Kuliće)
 - Kamenice-Bulbulušići (Od raskrsnice ispred okna „Kamenice“, zatim kroz naselje Kamenice i Bulbulušići do spoja sa LC Breza – M.Rijeka)
 - Breza – Mahmutovića Rijeka (Od pružnog prelaza u naselju Bulbulušići, prolazi kroz naselja Grabovik, Borak, Crema, Bukovik, Opreč, Kujave, Slivno, Orahovo do mosta u Mahmutovića Rijeci)
 - Mahmutovića Rijeka- Ilijaš (Od mosta u Mahmutovića Rijeci kroz naselje Dolovčići do spoja sa granicom Općine Ilijaš)
 - Dolovčići-Nasići (Od spoja sa LC M.Rijeka-Ilijaš u naselju Dolovčići do naselja Nasići)
 - Koritnik – Vlahinje (Od spoja sa LC Breza – M.Rijeka u Graboviku kroz naselje Koritnik pored Džamije, pa kružno pored mjesnog groblja do naselja Vlahinje)
 - Smailbegovići (Od spoja sa LC R-444 kod Stare džamije - kroz naselje Smailbegovići do spoja na LC R 444 kod O.Š. „Safvet-beg Bašagić“)
 - Mahala – Prhinje (Od spoja sa LC R-444 u Mahali, kroz ulicu Odred Plana zatim, pored pogona „Haldija“ i dalje preko Borova, kroz Prhinje do granice sa Općinom

Visoko)

- Vijesolići (Od spoja sa LC Mahala- Prhinje na raskrsnici Borovi kroz naselje Dužice do Džamije u naselju Vijesolići)
- Gornja Breza (Od mosta na potoku Jasike, kroz naselje Banjevac do prve raskrsnice na Gornjoj Brezi odakle se grana lijevo do spoja sa LC Vijesolići u Dužicama, a desno ide kroz naselje G.Breza pored Džamije do spoja sa LC Vardište)
- Vardište (Od spoja sa LC Vijesolići na lokalitetu bivšeg PK „G.Breza“ kroz gornji dio naselja G.Breza, i dalje do Džamije u naselju Vardište)
- Smrekovica (Od spoja na raskrsnici u ulici Bogumilska, preko bivšeg PK „Smrekovica“ i dalje kroz naselje Smrekovica pa niz ulicu Tičija do spoja sa LC Sutješćica)
- Sutješćica (Od spoja sa RC R-444 kroz Tičiju ulicu do mekteba u naselju Sutješćica)
- Mahala (Od spoja sa RC R-444 preko puta O.Š „Safvet-beg Bašagić“, kroz naselje Mahala, pa do izlaza na RC R-444 preko puta Doma kulture u Mahali).

IV – OGRANIČENJA I ZABRANE

Član 11. (Ograničenje brzine kretanja vozila)

Na putu, u naselju, vozač ne smije motornim vozilom da se kreće brzinom većom od 50 km na sat, odnosno brzinom označenom saobraćajnim znakom za cijelo naseljeno mjesto ili njegov dio.

Početak — završetak naselja, kao i ograničenje brzine kretanja vozila moraju se obilježiti odgovarajućim propisanim saobraćajnim znacima.

Nadležna služba može saobraćajnim znakom dozvoliti kretanje vozila i brzinom većom od 50 km na sat na putu, čiji saobraćajno — tehnički elementi dozvoljavaju.

Član 12. (Zabrana kretanja vozila)

Zabranjuje se kretanje svim motornim vozilima u oba smjera u sledećim ulicama:

- Ulica prema zgradi kino sale Breza i gradskoj biblioteci „Muhamed Kantardžić“,
- Ulica Bosanska,
- Ulica Hasana Kjačije.

Izuzetno, u ulicama iz prethodnog stava mogu se kretati:

- vozila hitne pomoći, vatrogasne službe, vozila MUP-a i Oružanih snaga BiH, kad posebnim uređajima daju svjetlosne i zvučne znakove kad izvršavaju određene službene zadatke;
- vozila osoba sa umanjnim tjelesnim sposobnostima, ako im to vozilo služi kao pomagalo u kretanju;
- vozila inspeksijskih organa kad vrše poslove iz svoje nadležnosti;
- vozila za prijevoz posmrtnih ostataka;

- vozila komunalnih i drugih preduzeća koja služe za održavanje čistoće, kanalizacije, vodovoda, grijanja, električnih i PTT vodova, kad obavljaju radnje za koje su namijenjena;
- vozila servisa kad vrše razne servisne usluge;
- vozila kad vrše snabdijevanje domaćinstava, trgovinskih i drugih subjekata u vremenu od 06 do 10 sati i od 16 do 18 sati, uz posjedovanje dokaza o isporuci robe ili vršenja usluga licu koje u navedenom prostoru posjeduje stambeni ili poslovni prostor.
- vozila stanara i zaposlenika i predstavnika političkih stranaka i državnih i političkih delegacija, uz dokaz o pravu korištenja poslovnog prostora, garaže, stana ili dokaz o radnom odnosu.

Vozila iz stava 2. tačka 1. do 6. ovog člana moraju biti obilježena nazivom firme, organa, organizacije ili ustanove, a korisnici vozila iz tačke 7. i 8. ovog člana moraju posjedovati valjane dokaze o vršenju isporuke roba i usluga (ugovor, narudžbenica i sl.), pravu korištenja poslovnih prostora, stanova ili garaža i istaknuti ih na vidno mjesto.

Član 13. (Zabrana kretanja teretnih motornih vozila)

Zbog tehničkih karakteristika puta zabranjuje se kretanje teretnih motornih vozila preko 7,5 tona ukupne nosivosti u ulicama:

- Odred Sretno (od raskrsnice kod Robota do raskrsnice Haldija)
- Dionica puta Banjevac – LC Mahala-Prhinje (od raskrsnice kod Džamije Banjevac do raskrsnice na Čivinom brdu)
- Dionica puta od pružnog prelaza Podžupča prema fabrici „Wood team“.

Član 14. (Zabrana zadržavanja vozila koje prevoze opasne materije)

Vozila koja prevoze opasne materije ne smiju se zadržavati na području općine Breza i u naseljenim mjestima grada osim na mjestima koja su drugim propisima utvrđena (benzinske pumpe, naftni terminalni, registrovana skladišta itd.).

Član 15. (Zabrana kretanja zaprežnim vozilima i gonjenje stoke)

Zabranjuje se kretanje zaprežnim vozilima i gonjenje stoka u krdu i stadu u svim ulicama u urbanom području.

Iznimno, nadležna služba može za turističke, kulturne i slične namjene odobriti kretanje kočija, zaprežnih vozila i jahanje konja na ulicama u urbanom području, ukoliko to ne ometa normalno odvijanje saobraćaja.

Član 16. (Ulice sa jednosmjernim saobraćajem)

Ulice sa jednosmjernim saobraćajem su:

- Ulica Titova (zabranjuje se kretanje motornih vozila iz pravca autobuske stanice prema Radničkom domu),
- Dijelovi ulice Ismeta Šarića (zabranjuje se kretanje motornih vozila iz pravca regionalne ceste, odnosno od kućnog broja 25 do kućnog broja 2., te se zabranjuje kretanje motornih vozila iz pravca ulice Ismeta Šarića od kućnog broja 6 do kućnog broja 35, odnosno do spajanja ove ulice sa regionalnom cestom).

V – ELEKTRIČNI ROMOBILI I NJIMA SLIČNA PREVOZNA SREDSTVA

Član 17. (Definicija električnog romobila)

Električni romobil, (u daljem tekstu: romobil) u smislu ove Odluke, jeste lično – pomoćno prevozno sredstvo sa jednim ili više točkova, pogonjeno električnim motorom koje može ili ne mora imati sjedište.

Pomoćnim prevoznim sredstvima u smislu ove Odluke koja su slična romobilu, pogonjena električnim motorom smatraju se sve vrste električnih skateboarda, hoverboarda, monocikla i sl.

Električnim romobilom ne smatraju se električna pomagala za invalidne osobe, bez obzira na izgled, broj točkova i snagu motora, te električni skuteri u bilo kojem obliku.

Lice koje upravlja električnim romobilom – vozač – korisnik je svaka fizička osoba koja koristi i trenutno posjeduje električni romobil na lokalnim i nekategorisanim cestama ili javnim površinama na području općine Breza.

Konstruisano opterećenje je najveće dozvoljeno opterećenje koje površina električnog romobila može izdržati u skladu sa tehničkom dokumentacijom i standardima koje je propisao proizvođač.

Učestalim činjenjem prekršaja smatra se posjedovanje najmanje tri pravosnažno izrečene novčane kazne za isti ili sličan prekršaj od strane lica koje upravlja električnim romobilom ili lica koja su navedena u članu 19. ove Odluke.

Ugrožavanje učesnika u saobraćaju predstavlja svaki oblik nedopuštenog ponašanja i neprihvatljivog ponašanja koji je uobičajen u društvenoj zajednici i koji je protivan odredbama Zakona iz oblasti saobraćaja ili ove Odluke, a naročito ponašanja koja su taksativno nabrojana u članu 19.

Član 18. (Kretanje električnog romobila)

Romobil se u pravilu kreće što bliže desnoj ivici kolovoza (asfaltnog zastora) u smjeru kretanja električnog romobila maksimalnom brzinom do 30 km/h ili trotoarom maksimalnom brzinom do 20 km/h.

Lice koje upravlja romobilom dužno je prije pokretanja romobila prilagoditi model vožnje romobila dozvoljenoj brzini i isto na zahtjev ovlaštenog službenog lica dokazati uvidom u programski displej romobila.

Član 19. (Zabrane kretanja električnog romobila)

Licu koje upravlja romobilom zabranjeno je:

- vožnja romobila po kolovozu saobraćajnica sa pješačkom stazom ukoliko je mlađi od 14 godina;
- vožnja romobila po kolovozu saobraćajnica sa pješačkom stazom ukoliko vozač nema položen ispit iz poznavanja propisa o sigurnosti saobraćaja na cestama, minimalno za kategoriju moped u skladu sa Zakonom o bezbjednosti saobraćaja na cestama u BiH i Pravilnikom o osposobljavanju kandidata za vozača motornih vozila,
- vožnja romobila brzinom većom od definisane u članu 18. ove Odluke;
- vožnja romobila u školskim dvorištima u vremenu izvođenja nastave kada su lica koja upravljaju romobilom dužna da isti guraju pored sebe;
- vožnja pod uticajem alkohola i/ili opojnih droga;

- korištenje električnog romobila bez ispravnog prednjeg bijelog i zadnjeg crvenog svjetla;
- prevoz drugih lica;
- vožnja romobila ako se na njemu nalaze predmeti koji u bitnoj mjeri umanjuju stabilnost romobila (predmeti koji su širi ili viši za 0,80 cm od širine ili visine romobila mjereno od najjisturenijeg sa obje strane ili najvišeg dijela romobila) ili svojom težinom prelaze konstruisano opterećenje;
- korištenje i upotreba mobilnih telefona i upotreba slušalica na oba uha;
- da vuče ili bude vučen drugim električnim romobilom, biciklom ili motornim vozilom;
- da ispušta upravljač iz ruku osim kada najavljuje promjenu smjera kretanja, ukoliko na romobilu nema pokazivača pravca;

Član 20. **(Dužnosti vozača električnog romobila)**

Vozač romobila je prilikom vožnje dužan:

- pridržavati se saobraćajnih propisa i pravila;
- izbjegavati ugrožavanje drugih učesnika u saobraćaju ili pješaka naročito, naglim skretanjima, krivudanjima, vožnjom bez držanja odstojanja od drugih učesnika u saobraćaju, vozača romobila, biciklista, pješaka, skakanje i dr.;
- voziti se jedan iza drugog ako se voze u grupi;
- prilikom prelaska preko pješačkog prelaza da gura romobil pored sebe;
- nositi zaštitnu kacigu zakopčanu na glavi;
- koristiti reflektirajući prsluk ili reflektirajuće trake ili reflektirajuće predmete u vremenu od prvog sumraka do prvog svitanja, te u uslovima smanjene vidljivosti, (magla, kiša i dr. vremenske neprilike);
- koristiti potpuno tehnički ispravan romobil i isti održavati u tehnički ispravnom stanju;

VI – ZAUSTAVLJANJE I PARKIRANJE

a. OPĆE ODREDBE

Član 21. **(Zabrana zaustavljanja i parkiranja bez saobraćajnog znaka)**

Vozač ne smije da zaustavi ili parkira vozilo na mjestu na kojem bi ono ugrožavalo bezbjednost drugih učesnika u saobraćaju ili predstavljalo smetnju za normalno odvijanje saobraćaja ili kretanja pješaka.

Zabranjeno je parkiranje u svim dvosmjernim ulicama, ukoliko saobraćajnim znakom ili oznakom na kolovozu nije drugačije određeno.

U ulicama sa jednosmjernim saobraćajem, vozila se mogu zaustavljati odnosno parkirati uz desnu ili lijevu ivicu kolovoza, zavisno kako je regulisano saobraćajnim znakom ili oznakama na kolovozu.

Član 22. **(Slučajevi u kojima je zabranjeno zaustavljanje i parkiranje)**

Vozač ne smije da zaustavi ili parkira vozilo naročito:

- na obilježenom pješačkom prelazu i na razdaljini manjoj od pet metara od tog prelaza;
- na prelazu puta preko željezničke ili tamvajske pruge u istom nivou i na udaljenosti

- manjoj od 15 metara;
- na željezničkim prugama ili u blizini tih pruga ako se time sprečava ili ometa saobraćaj vozila koja se kreću po šinama;
 - na raskrsnici i na razdaljini manjoj od pet metara od najbliže ivice poprečnog kolovoza;
 - u tunelima, na mostovima, u podvožnjacima i na nadvožnjacima, kao i na dijelovima puta ispod mostova i nadvožnjaka i na razdaljini manjoj od 15 metara od tih objekata;
 - na dijelu puta u blizini vrha prevoja i u krivini gdje je preglednost puta nedovoljna i gdje se obilaženje vozila ne bi moglo izvršiti bez opasnosti;
 - na dijelu puta na kojem bi širina slobodnog prolaza od zaustavljenog ili parkiranog vozila do neisprekidane uzdužne linije na kolovozu, ili do suprotne ivice kolovoza, ili do neke prepreke na putu bila manja od tri metra;
 - na mjestu na kojem bi vozilo zaklanjalo postavljeni saobraćajni znak ili uređaj za davanje svjetlosnih saobraćajnih znakova;
 - na dijelu kolovoza koji je kao stajalište za vozila javnog saobraćaja obilježen saobraćajnim znakom i/ili oznakama na kolovozu;
 - na svim zelenim površinama, parkovima i sl.;
 - na mjestu koje je označeno kao parking — prostor za lica sa invaliditetom ako vozilo nije obilježeno posebnim znakom;
 - na trotoaru, odnosno pješačkoj stazi, ako to nije izričito regulisano saobraćajnim znakom, a ako je parkiranje dozvoljeno, mora se ostaviti najmanje 1,6 metara širine na površini za kretanje pješaka.

Osim u slučajevima stava 1 ovog člana, vozač ne smije da parkira vozilo naročito na:

- prolazima i ulazima škola, ustanova, preduzeća, stambenih zgrada i drugih objekata i iznad priključka na vodovodnu mrežu i ulaza u kanalizacionu ili drugu mrežu komunalnih organizacija;
- mjestu na kome bi parkirano vozilo onemogućilo pristup drugom vozilu radi parkiranja ili izlazak nekom već parkiranom vozilu;
- na kolovozu sa dvije saobraćajne trake gdje se saobraćaj odvija u oba smjera.

Član 23.

(Zabrana parkiranja za autobuse, teretna vozila, kamp prikolice i sl.)

Na području cesta namijenjenih za saobraćaj na području općine, zabranjeno je parkiranje autobusa, teretnih vozila preko 3,5 tone najveće tehničke dopuštene mase i kamp prikolice.

b. JAVNA PARKIRALIŠTA

Član 24.

(Vrste parkirališta)

Za zaustavljanje i parkiranje vozila na području općine utvrđuju se javna parkirališta.

Javnim parkiralištem smatra se javna površina namijenjena isključivo za zaustavljanje i parkiranje određena ovom Odlukom.

Parkirališta u smislu ove Odluke su površine na kojima se mogu parkirati motorna vozila duže od 5 minuta.

Parkirališta mogu biti opća parkirališta, rezervisani prostor za parkiranje.

Član 25.

Opća parkirališta su mjesta na kojima se mogu parkirati putnički automobili i teretna

motorna vozila do 3,5 tona ukupne dozvoljene mase.

Rezervisani prostor za parkiranje vozila je onaj prostor koji se rezerviše isključivo za parkiranje od strane javnih organa i preduzeća a koji su definisani ovom Odlukom.

Član 26. (Javna parkirališta)

Javna parkirališta moraju biti označena saobraćajnom signalizacijom u skladu sa propisima o bezbjednosti saobraćaja.

Javna parkirališta mogu biti stalna i privremena.

Pripremanje i obilježavanje javnih parkirališta vrši nadležna služba i ugovorom ovlašteno pravno lice.

Član 27. (Stalna i privremena parkirališta)

Stalna javna parkirališta su:

1. Parking prostor u ulici Bosanska,
2. Parking prostor preko puta Robota,
3. Parking prostor od ulice Odred Sretno (semafor) do zgrade Borac,
4. Parking prostor između pošte i Gradske džamije,
5. Parking prostor kod JP Komunalno d.o.o. Breza,
6. Parking prostor u ulici Titova (kod autobusnog stajališta),
7. Parking prostor ispred sportsko rekreacionog centra „ADA“ Breza,
8. Parking prostor u ulici Ismeta Šarića,
9. Parking prostor uz zgradu Albanija.

Privremena parkirališta su:

1. Parking prostor ispred zgrade Općine Breza, osim radnim danima u vremenu od 7 – 16 sati,
2. Plato Bečarska.

Član 28. (Rezervisana parking mjesta)

Po jedno parking mjesto dodjeljuje se:

- JP „Komunalno“ d.o.o. Breza na parking prostoru koji se nalazi pored zgrade JP „Komunalno“ Breza
- Centru za socijalni rad Breza na parking prostoru pored zgrade JP „Komunalno“ Breza,
- JP „BH Pošta“ na parking prostoru koji se nalazi između pošte i Gradske džamije.

Nadležna služba će izvršiti označavanje definisanih parking mjesta.

Član 29. (Naplata parkirališta)

Na parkiralištima iz člana 27. ove Odluke kao i rezervisanim parking mjestima iz člana 28. ove Odluke neće se vršiti naplata parkiranja vozila dok se posebnom odlukom ne uredi drugačije.

Član 30.
(Parkinzi za osobe sa invaliditetom)

Na javnim parkirališta na posebno obilježenim mjestima rezervisanim za parkiranje vozila osoba sa invaliditetom, imaju pravo parkirati osobe sa invaliditetom i korisnici vozila koje na vozilu imaju istaknut važeći međunarodni znak pristupačnosti, u skladu sa odredbama Zakona o osnovama bezbjednosti saobraćaja na putevima u BiH i odredbama Pravilnika o načinu obilježavanja vozila kojim upravlja lice sa oštećenim ekstremitetima.

Član 31.
(Zabrana parkiranja na javnim parkiralištima)

Na javnim parkiralištima zabranjeno je:

- Ostavljanje neispravnog ili havarisanog vozila, zbog dotrajalosti neupotrebljivih vozila, kao i vozila koja nemaju svoj vlastiti pogon.
- Zauzimanje parking mjesta putem ograđivanja (rampa, ograde i drugi predmeti koji fizički ometaju parkiranje).
- Plaketiranje, crtanje i pisanje grafita i drugih sadržaja na parkirališnoj opremi i saobraćajnoj signalizaciji na parkinzima.
- Vršenje popravke vozila duže od 15 minuta.
- Trajno odlaganje smeća, ogrevnog, građevinskog i drugog materijala.
- Vršenje bilo kakve radnje koje bi ometale nesmetano parkiranje ili oštetilo parkirana vozila.

Član 32.
(Povreda odredaba/uslova za korištenje javnog parkirališta)

Korisnik parkinga čini povredu odredaba uslova korištenja javnog parkirališta propisanih ovom Odlukom, koja će biti sankcionisana plaćanjem ugovorene kazne ako:

- ako svojim položajem parkiranja zauzima više parking mjesta,
- ako je vozilo parkirano na posebno označenom mjestu za invalidne osobe bez međunarodnog znaka pristupačnosti,

c. TAKSI STAJALIŠTA

Član 33.
(Taksi stajališta)

Lokacije taksi stajališta na području općine Breza:

- Ulica Titova – „Autobuska stanica Breza“
- Parking prostor preko puta Robota

Taksi stajališta se obilježavaju u skladu sa Pravilnikom o uslovima koje moraju ispunjavati taksi stajališta.

d. PREMJEŠTANJE NEPROPISNO ZAUSTAVLJENIH I PARKIRANIH VOZILA

Član 34.

(Premještanje nepropisno zaustavljenih i parkiranih vozila)

Na cesti i u cestovnom pojasu, pješačkim stazama, uređenim javnim površinama, zelenim površinama i mjestima gdje je dozvoljeno zaustavljanje i parkiranje vozila, zabranjeno je ostaviti vozila koja se ne upotrebljavaju u saobraćaju zbog dotrajalosti (havarisana, neregistrovana i slično).

Ako policijski službenik ili komunalni inspektor utvrdi da se na površini iz stava 1, nalazi vozilo ostavljeno na način iz prethodnog stava, odredit će se da se takvo vozilo ukloni od strane vlasnika o njegovu trošku, odnosno korisnika i premjesti na za to određeno mjesto.

Ako je vlasnik, odnosno korisnik nepoznat, vozilo će se ukloniti na teret sredstava općine Breza dok se ne utvrdi vlasnik vozila.

VII – OBUČAVANJE KANDIDATA ZA VOZAČE

Član 35.

(Lokacija za početnu obuku)

Početna obuka za upravljanje motornim vozilima vrši se u ulici Potkrajaska, dionica od mehtefa u naselju Smailbegovići do raskrsnice kod Stare džemije i/ili na uređenim parkiralištima.

Član 36.

(Polazno mjesto za polaganje vozačkog ispita)

Polazno mjesto za polaganje vozačkog ispita iz oblasti upravljanja motornim vozilima na području općine Breza je sa parking prostora preko puta Robota, subotom ili drugi dan koji odredi Ministarstvo za obrazovanje, nauku, kulturu i sport ZDK u vremenskom periodu od 08:00 do 16:00 sati.

VIII – DJEČIJE IGRE NA CESTI

Član 37.

(Uslovi za dozvolu dječijih igara na cesti)

Nadležna služba, može odrediti ulice u kojima će se održavati dječije igre (klizanje, sankanje, igre loptom, i sl.) na prijedlog obdaništa, škola i drugih ustanova.

Za vrijeme održavanja dječijih igara iz prethodnog stava, mora biti zabranjen saobraćaj za motorna vozila uz obavezno regulisanje saobraćaja u skladu sa Zakonom o osnovama bezbjednosti saobraćaja na putevima u BiH.

IX – PRIREDBE I DRUGE AKTIVNOSTI NA CESTAMA

Član 38.

(Održavanje priredbi i aktivnosti na javnoj cesti)

Sportske, kulturne i druge priredbe i aktivnosti na javnoj cesti, ulici i pješačkoj zoni u području općine ne smiju se održavati bez odobrenja.

Odobrenje izdaje nadležna služba.

Izuzetno, za priredbe i aktivnosti koje se održavaju u uvjetima uobičajnog odvijanja saobraćaja, nije potrebno odobrenje.

X – POSEBNE MJERE BEZBJEDNOSTI

Član 39.

(Pranje i popravka vozila)

Pranje i popravka vozila na javnim saobraćajnim površinama je zabranjeno.

Izuzetno, na licu mjesta se mogu vršiti nužne popravke na vozilu nastale u toku vožnje, samo ako se kvar na drugi način ne može otkloniti, pod uvjetom da se time ne ometa uredno i bezbjedno odvijanje saobraćaja uz obavezu isticanja odgovarajuće saobraćajne signalizacije.

Član 40.

(Obaveza označavanja opasnog ili oštećenog dijela kolovoza ili trotoara)

Ako se dio kolovoza ili trotoara ne može koristiti za saobraćaj vozila ili kretanje pješaka zbog privremene opasnosti (odronjavanje sa zgrade, skidanje snijega, radovi i sl.) izvođač radova dužan je da postavi odgovarajuće saobraćajne znakove na obje strane tog prostora.

Obavezu označavanja opasnog ili oštećenog mjesta ima i korisnik ili vlasnik infrastrukturnih instalacija.

Član 41.

(Obnavljanje horizontalne saobraćajne signalizacije)

Horizontalna saobraćajna signalizacija na saobraćajnicama, autobusnim stanicama i taksi stajalištima mora se obnavljati najmanje jedanput godišnje.

Horizontalna saobraćajna signalizacija se iscrtava na osnovu saobraćajnog projekta.

Član 42.

(Postavljanje, održavanje i kontrola saobraćajnih znakova i oznaka)

O postavljanju, održavanju i kontroli saobraćajnih znakova, oznaka na kolovozima i druge opreme za regulisanje saobraćaja, redovno se stara nadležna služba, po službenoj dužnosti, inspekcije za ceste, komunalne inspekcije i Policijska stanica Breza, svako iz svoje nadležnosti.

XI – ZAŠTITA JAVNIH SAOBRAĆAJNIH POVRŠINA

Član 43.

(Zabrana postavljanja predmeta kojima se ometa odvijanje saobraćaja)

Zabranjeno je bez odobrenja nadležne gradske službe, na bilo koji način, na javnim saobraćajnim površinama ostavljati, postavljati, ugrađivati i sl. predmete ili materijale, ili izvoditi radove kojim se oštećuju površine i objekti koji pripadaju tim površinama, zauzimaju saobraćajne površine, ometanje, odvijanje saobraćaja ili ugrožava čovjekova okolina.

Član 44.
(Zabrana postavljanja, uklanjanja i oštećivanja znakova i opreme)

Zabranjeno je neovlašteno postavljanje, uklanjanje i oštećivanje saobraćajnih znakova i opreme puta ili izmjene značenja saobraćajnih znakova.

Član 45.
(Nadoknada nanesene štete)

Pravno ili fizičko lice koje je nanijelo štetu iz člana 43. i 44. ove Odluke, dužno je nadoknaditi štetu prema cjenovniku ili ponudi izvođača radova odmah, a najkasnije u roku od 8 dana od dana nastanka štete, prema zaključku nadležne službe ili inspekcije, a ukoliko je pokrenut sudski postupak utvrđivanje krivice, 8 dana od dana pravosnažnosti sudske presude.

XII – NADZOR

Član 46.
(Nadzor na provođenjem Odluke)

Nadzor nad provođenjem ove Odluke obavlja Policijska stanica Breza i nadležna služba i inspekcija u okviru svojih nadležnosti.

Član 47.
(Prava i dužnosti inspekcije)

Inspekcija ima pravo i dužnosti da:

- naredi otklanjanje nedostataka koji su u suprotnosti sa ovom Odlukom,
- obustavi ili zabrani radove ili radnje koje su u suprotnosti sa ovom Odlukom,
- naredi ili odobri da se poduzmu radnje ili radovi zbog dovođenja u prvobitno ili ispravno stanje,
- poduzme ostale mjere i radnje u cilju provođenja ove Odluke i drugih propisa iz ove oblasti,
- prati provođenje donešenih mjera.

Član 48.
(Otklanjanje nedostataka ili poduzimanje određenje radnje)

U slučaju kad je ugrožena bezbjednost saobraćaja, te životi i zdravlje ljudi, inspektor može narediti otklanjanje nedostataka ili poduzimanje određene radnje ili radova i inspekcijskom zapisnikom, s tim što je obavezan donijeti rješenje u roku od tri dana od dana uručivanja zapisnika.

Rok izvršenja teče od dana predaje zapisnika.

Na zahtjev inspekcije, Policijska stanica Breza je dužna pružiti asistenciju policije.

XIII – KAZNENE ODREDBE

Član 49.
(Visina kazni za preduzeća ili druga pravna lica)

Novčanom kaznom u iznosu od 300,00 KM do 3.000,00 KM kaznit će se za prekršaje preduzeća ili drugo pravno lice ako:

1. izmjeni režim saobraćaja ili privremeno ograniči saobraćaj bez odobrenja,
2. postavi znakove informacije, reklamnih panoa i natpisa bez odobrenja,
3. se kreće teretno vozilo u ulicama u kojima je uvedena zabrana saobraćaja bez dozvole od nadležne službe,
4. ostavi neispravno ili havarisano vozilo na javnoj površini,
5. organizuje priredbe bez odobrenja nadležne gradske službe
6. ne postavi saobraćajnu signalizaciju za slučajeve iz člana 40. ove Odluke,
7. bez odobrenja, na bilo koji način, na javnim saobraćajnim površinama ostavlja, postavlja, ugrađuje i sl. predmete ili materijale, ili izvodi radove kojim se oštećuju površine i objekte koji pripadaju tim površinama, zauzima saobraćajne površine, ometa odvijanje saobraćaja ili ugrožava čovjekovu okolinu,
8. neovlašteno postavlja, uklanja i oštećuje saobraćajne znakove i opremu puta ili mijenja značenje saobraćajnih znakova,
9. ne postupi po aktu, nalogu, zapisniku, rješenju ili zaključku nadležnog inspektora.

Za prekršaje iz prethodnog stava kaznit će se novčanom kaznom od 100,00 KM do 300,00 KM i odgovorno lice u preduzeću ili drugom pravnom licu.

Član 50. (Visina kazni za fizička lica)

Novčanom kaznom od 50,00 KM do 300,00 KM kaznit će se za prekršaje fizička lica ili roditelj/staratelj ukoliko se radi o malodobnom djetetu (kada je u pitanju vožnja romobila), ako:

1. vozač vozila koje prevozi opasne materije suprotno članu 14. Odluke
2. gonič stoke ako postupa suprotno članu 15. Odluke,
3. upravlja električnim romobilom na način definisan članom 19. ili suprotno odredbama člana 20 ove Odluke,
4. postavi znakove informacija, reklamnih panoa i natpisa bez odobrenja,
5. javne parkinge koristi suprotno odredbama člana 31. ove Odluke,
6. ne postpi po naredbi u predviđenom roku prema članu 34.,
7. bez odobrenja, na bilo koji način, na javnim saobraćajnim površinama ostavlja, postavlja, ugrađuje i sl. predmete ili materijale, ili izvodi radove kojim se oštećuju površine i objekte koji pripadaju tim površinama, zauzima saobraćajne površine, ometa odvijanje saobraćaja ili ugrožava čovjekovu okolinu,
8. neovlašteno postavlja, uklanja i oštećuje saobraćajne znakove i opremu puta ili mijenja značenje saobraćajnih znakova,
9. ne postupi po aktu, nalogu, zapisniku, rješenju ili zaključku nadležnog inspektora.

Član 51. (Finansiranje preventivnih aktivnosti)

Novčane kazne naplaćene po ovoj Odluci prihod su Općine Breza, a koriste se za finansiranje preventivnih aktivnosti u cestovnom saobraćaju (informativno — propagandna djelatnost, unapređenje saobraćajno — tehničke kulture, nabavke i postavljanje saobraćajnih znakova, sanacija ulica i drugih aktivnosti koje se odnose na unapređenje bezbjednosti saobraćaja).

XIV – PRELAZNE I ZAVRŠNE ODREDBE

Član 52. (Prestanak važenja Odluke)

Stupanjem na snagu ove Odluke prestaje da važi Odluka o bezbjednosti i saobraćaja na putevima općine Breza („Službeni glasnik Općine Breza“, broj: 6/11).

Odredbe ove Odluke koje se odnose na električne romobile primjenjivat će se do stupanja na snagu Zakona o osnovama sigurnosti saobraćaja Bosne i Hercegovine kojim će biti regulisano korištenje električnih romobila, nakon čega će se primjenjivati odredbe tog zakona.

Član 53. (Stupanje na snagu)

Ova Odluka stupa na snagu prvog dana od objavljivanja u Službenom glasniku Općine Breza.

Predsjedavajući Općinskog vijeća

.....
Muamer Salkić

OBRAZLOŽENJE

I – PRAVNI OSNOV

U članu 2. Zakona o osnovama bezbjednosti saobraćaja na putevima u Bosni i Hercegovini („Službeni glasnik BiH“, broj: 6/06, 75/06, 44/07, 84/09, 48/10, 18/13, 8/17, 89/17, 9/18, 46/23 i 88/23) propisano je da: „Organi Bosne i Hercegovine, entitetski i kantonalni organi i organi Brčko Distrikta Bosne i Hercegovine i organi lokalne samouprave i lokalne uprave u gradovima i općinama osigurati će provođenje ovog Zakona i u okviru svoje nadležnosti donositi propise i preduzimati druge potrebne mjere za njegovo dosljedno provođenje“.

U članu 8. stav (3) Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) propisano je da u vlastite nadležnosti jedinice lokalne samouprave posebno, između ostalih, spadaju: upravljanje, finansiranje i unapređenje djelatnosti i objekata lokalne komunalne infrastrukture, a u šta su ubrojani lokalni putevi i mostovi, kao i javna parkirališta.

U članu 20. stav (1) tačka 2. Statuta Općine Breza („Službeni glasnik Općine Breza“, broj: 7/21) propisano je: Vijeće u okviru svojih nadležnosti, donosi odluke i druge opće akte kojima uređuje pitanja iz samoupravnog djelokruga Općine.

II - RAZLOZI ZA DONOŠENJE

Uzimajući u obzir činjenicu da je Zakon o osnovama sigurnosti saobraćaja na putevima u Bosni i Hercegovini krovni zakon, te da on propisuje samo osnove sigurnosti saobraćaja, ukazala se potreba za donošenjem jednog podzakonskog akta kojim bi se preciznije propisale mjere bezbjednosti te uslovi i pravila za odvijanje saobraćaja na javnim saobraćajnim površinama koje su u nadležnosti Općine Breza, tj. lokalnih i nekategorisanih cesta na području općine Breza, kao i javnih parking prostora.

Također, Skupština Zeničko-dobojskog kantona je na 38. sjednici održanoj dana 23.04.2025. godine donijela Zaključak kojim se preporučuje jedinicama lokalne samouprave na području Zeničko-dobojskog kantona da, u okviru svojih nadležnosti, aktima kojima se uređuje organizacija, uslovi i pravila sigurnosti saobraćaja na javnim saobraćajnim površinama na teritoriji njihovih općina i gradova, te mjere za njihovo provođenje, regulišu i kretanje vozila i drugih ličnih prevoznih električnih prijevoznih sredstava, te predvide odgovarajuće sankcije za vozače istih, s ciljem spriječavanja potencijalnih nesreća, osiguranja reda u centralnim gradskim i općinskim ulicama i pješačkim zonama, povećanja sigurnosti pješaka, posebno djece, poboljšanja ukupne sigurnosti svih učesnika u saobraćaju i osiguranja nesmetanog i sigurnog prostora za kretanje u najprometnijim gradskim i općinskim zonama.

Obrađivač: Edvina Kadrić-Velić

Pomoćnik načelnika

.....
Haris Nefić

III - OBRAZLOŽENJE PREDLOŽENIH RJEŠENJA

Odluka sadrži 14 tematskih cjelina, odnosno podijeljena je u 14 poglavlja, i to:

I - OSNOVNE ODREDBE	1
II - ORGANIZACIJA I REGULACIJA SAOBRAĆAJA.....	2
III - PRVENSTVO PROLAZA.....	3
IV - OGRANIČENJA I ZABRANE.....	4
V - ELEKTRIČNI ROMOBILI I NJIMA SLIČNA PREVOZNA SREDSTVA	6
VI - ZAUSTAVLJANJE I PARKIRANJE.....	7
VII - OBUČAVANJE KANDIDATA ZA VOZAČE	11
VIII - DJEČIJE IGRE NA CESTI.....	11
IX - PRIREDBE I DRUGE AKTIVNOSTI NA CESTAMA	11
X - POSEBNE MJERE BEZBJEDNOSTI	12
XI - ZAŠTITA JAVNIH SAOBRAĆAJNIH POVRŠINA	12
XII - NADZOR.....	13
XIII - KAZNENE ODREDBE.....	13
XIV - PRELAZNE I ZAVRŠNE ODREDBE.....	15